



## Qeqqata Kommunia-ni Kommunalbestyrelsip suleriaasissaa

### Kommunalbestyrelsip ataatsimiittarneri

**§ 1.** Kommunalbestyrelsip ataatsimiinneri tamanut ammasuupput. Taamaattoq Kommunalbestyrelsip akuersissutigisinnavaa suliassat ataasiakkaat matoqqasumik oqaluuserineqarnissaat, tak. aqtsinermi inatsisip § 9.

**Imm. 2.** Suliassat kinguliiniittut matoqqasumik oqaluuserineqassapput:

- 1) Suliassat aalajangiivigneqarnissaminni inunnut tunngassuteqartunik naliliisariaqarfiusut
- 2) Suliassat illuutinik aalaakkaasunik pisinissamik tunisinissamilluunniit ilaqartut, aamma
- 3) Illuni suliassat pisiassallu pillugit missingiutit neqeroorutillu.

**Imm. 3.** Taamaattoq suliassap matoqqasumik oqaluuserineqarnissaanut tunngavissaqarnersoq pillugu apeqqut matoqqasumik oqaluuserineqassaaq tamanna Kommunalbestyrelsimit imaluunniit borgmesterimit aalajangerneqarpat, tak. aqtsinermi inatsisip § 9. Imm. 1, oqaasertaa kingulleq.

**Imm. 4.** Suliassat matoqqasumik oqaluuserineqartussat sapinngisamik kingulliullugit oqaluuserineqassapput.

**Imm. 5.** Kialluunniit Kommunalbestyrelsip ataatsimiinneri ammasut najuuffigisinnavaai eqqisisimasumik torersumillu pissuseqarnissamik piumasaqaateqarneq sianigalugu. Tusarnaartup oqaluuserinninnerit akornusersorpagit borgmesterip pineqartoq imaluunniit pisariaqartinneqarpat tusarnaartut tamaasa ataatsimiinnermit qimagutsissinnaavai. Borgmesterip innimingersinnaavai immikkut inissat tusagassiorfiit sinniisuisa atugassaat.

**Imm. 6.** Kommunalbestyrelsip akuerisinnavaa Kommunalbestyrelsip ataatsimiinnerisa ammasut TV-mut imaluunniit radio-mut immiunneqarnissaat.

**§ 2.** Ilaasortaq Kommunalbestyrelsip ataatsimiinnissaani ataatsimeeqataasinnaajunnaaruni tamuminnga borgmesteri nalunaarfingissavaa ataatsimiinnissaq sapinngisamik ullunik marlunnik sioqqullugu. Ataatsimiinnerni ataasiakkaani ataatsimiinnerup imaqarniliornerani allanneqartassaaq ilaasortaq kina ataatsimeeqataasimanngimmersoq.

### Oqaluuserisassat nassiussorneqarnerat suliassallu saqqumitinneqarnerat

**§ 3.** Kommunalbestyrelsimit apeqquteqaatit allakkatigut saqqummiunneqartassapput. Ilaasortaq ileqqusumik ataatsimiinnissaq kingusinnerpaamik ullunik 21-inik sioqqullugu allakkatigut suliamik oqaluuserinneqquulluni qinnuteqarsimappat, suliaq borgmesterip ataatsimiinnissamut tullermut oqaluuserisassatut ilanngutissavaa.

**Imm. 2.** Borgmesterip isumagissavaa ileqquusumik ataatsimiinnissaq kingusinnerpaamik ullunik 7-inik sioqqullugu oqaluuserisassanut takussutissiaq Kommunalbestyrelsimi ilaasortanut tamanut nassiunneqarnissaa.

**Imm. 3.** Suliassaq ileqquusumik ataatsimiinnissami oqaluuserisassanut ilanngunneqaraangat suliassap nalilerneqarnissaanut atugassat pisariaqartinneqartut - ilaasortanut nassiunneqareersimanngikkunik - kommunip allaffianut takuniarneqarsinnaapput ataatsimiinnissaq sioqqullugu sivikinnerpaamik ulluni 6-ini. Tamatumunnga peqatigitillugu oqaluuserisassanut takussutissiaq saqqumitinneqassaaq.

**Imm. 4.** Immikkut ittumik ataatsimiinnissamut ataatsimiigiaqqusinermini borgmesterip sa-pinnigisamik sukumiisumik ilaasortanut ilisimatitsissutigissavai suliassat suut ataatsimiinnissami oqaluuserineqarumaarnersut.

#### **Aalajangiisinhaassuseq, ataatsimiinnerup aqunneqarnera suliassallu saqqummiunneqarnerat**

**§ 4.** Kommunalbestyrelsimi aalajangiisinhaassuseqarpoq ikinnerpaamik ilaasortat affaat ataatsimiinnermi peqataappata, tak. aqutsinermi inatsisip § 11-ani, imm. 1.

**Imm. 2** Kommunalbestyrelsi, ilaasortamit saaffigineqarnermigut ataatsimiinnermi teknik-ikkut attaveqaatit atorlugit peqataasinnaanissa akuersissutigisinhaavaa, tak. aqutsinermi inatsisip § 11-ani, imm. 2.

**Imm. 3.** Borgmesterip pisinnaatinagulu tullersortaata (aappaata) Kommunalbestyrelsip ataatsimiinneri aquttassavai. Ataatsimiinnerillu ingerlannerini apeqqutitigut sutigut tamatigut torersumillu ingerlanneqarnisaanut aqutsisuussalluni. Taamatuttaaq taassisutigineqartussat oqaasertassai/isikkussai aalajangiiffigisassallugit.

**Imm. 4.** Kinaluunniit oqaaseqarumasoq borgmesterimut saaffiginnissaq, taassumalu ilaasortat piumasaqaateqarsimasut tulleriinneri malillugit oqaaseqartittassavai. Ilaasortat arlallit oqaaseqarumallutik ataatsikkut piumasaqaateqarpata borgmesterip oqaaseqartussat tulleriinnilissavai. Oqaaseqartut borgmesteriunngitsumit kipitinneqassanngillat.

**Imm. 5.** Ilaasortap kialluunniit torersumik pissuseqarnissap malinneqarnissaa pillugu borgmesterip aalajangiinera malissavaa. Ilaasortaq ataatsimiinnermi ataatsimi marloriarluni torersumik pissuseqarnissamik peqquneqarsimappat borgmesterip siunnersuuteqarneratigut ataatsimiinnermi tessani oqaaseqaqqissanngitsoq Kommunalbestyrelsip aalajangersinhaavaa.

**Imm. 6.** Borgmesterip apeqqutit aalajangiiffigisinhaasani Kommunalbestyrelsimit aalajangiiffigisassanngortissinaavai.

**§ 5.** Suliassat ataatsimiinnermi oqaluuserineqassapput borgmesterip tulleriinnilersuinera malillugu, taamaalillunilu oqaluuserisassanut takussutissiami tulleriinnilersuineq saneqqussinnaallugu.

**Imm. 2.** Ilaasortaq kinaluunniit ataatsimiinnerup aallartinnerani oqaluuserisassanut takussutisiaq pillugu, tassunga ilanngullugu oqaluuserisassat tulleriaarneqarnerat pillugu oqaaseqarnisaminik aammalu oqaluuserisassat matoqqasumi oqaluuserisassanut nuunneqarnissaannik

akerlianilluunniit piumasaqaateqarsinnaavoq.

**§ 6.** Inatsisitigut allamik aalajangiisoqarsimanngippat imaluunniit marloriarluni oqaluuserinninnissaq Kommunalbestyrelsimit aalajangiunneqarsimanngippat suliassaq ataasiaannarluni oqaluuserineqassaaq. Kommunip aqtsinikkut ileqqoreqqusaa aqtsinermi inatsisip § 1, imm. 2 naapertorlugu marloriarluni oqaluuserineqassaaq, aammattaaq ukiumoortumik missingersuusiat marloriarlutik oqaluuserineqassapput, tak. aqtsinermi inatsimmi § 42, imm. 1.

**Imm.2.** Siullermeerlugu oqaluuserinninnermi suliassap aalajangiivigineqarnissaa taasisutigineqassanngilaq, taamaallaat aappassaaneerlugu oqaluuserisassanngortinnejnarnera. Suliassap aappassaaneerlugu oqaluuserisassanngortinnejnarnerani ilaasortaq kinaluunniit suliassap pineqartoq pillugu oqaaseqarumasinnaavoq. Siullermeerlugu aappassaannerlugulu oqaluuserineqarnera ullormi ataatsimi pissanngilaq. Taamaattoq aqtsinikkut ileqqoreqqusap aamma ukiumoortumik missingersuusiat siullermeerlugu aappassaaneerlugulu oqaluuserineqarnerat pissaaq aqtsinermi inatsisip §§ 1, imm. 2 aamma 42, imm. 1 malillugu ullunik 14-inik akunneqartillugit.

**Imm.3.** Suliassaq marloriarlugu oqaluuserineqassatillugu siullermeerlugu oqaluuserineqarnerani pappiaqqat atorneqartut sapinngisamik ilaarsortanut saqqummiunneqassapput imaluunniit taakku akornanni kaaviiartinneqassallutik.

**§ 7.** Kommunalbestyrelsi aalajangersinnaavoq suliassaq ataatsimiititaliap aalajangersimasup susassaqarfiinut ilaangitsoq ataatsimiititaliat ataavartut ilaanni oqaluuserisassanngortinnejnassaoq.

**Imm. 2.** Kommunalbestyrelsi isumaqarpat suliassaq Kommunalbestyrelsimi oqaluuserineqannginnermini immikkut ataatsimiititaliami oqaluuserineqartariaqartoq ataatsimiititaliaq taamaattoq pilersinneqassaaq Kommunalbestyrelsip suliassami tassani aalajangiinera malillugu amerlassuseqartunik ilaasortaqartoq.

**Imm. 3.** Immikkut ataatsimiititaliaq nammineq siulittaasussaminik qinersisussaaq, allaganngorlugu nassuaasiussaaq borgmesterimut ingerlatinnejartussamik, taassumalu taanna Kommunalbestyrelsimi ilaarsortanut agguatissavaa.

### **Oqaluuserinninnermi taasinermilu ilaasortat peqataanissaat**

**§ 8.** Ilaasortat ilaat suliassami aalajangersimasumi inuttut ima soqtigisaqartiginersoq, suliassamillu taassuminnga Kommunalbestyrelsip oqaluuserinninnerani taasinernilu peqataanngitsortariaqarnersoq, Kommunalbestyrelsip aalajangiiffigissavaa. Taamatut pisoqartillugu suliassap saqqummiunneqarnerani, oqaluuserineqarnerani taasissutigineqarneranilu pineqartup ini ataatsimiiffik qimassimassavaa.

Ilaasortaq imminerminut tunngasutigut suliami peqataasinnaanerminik Kommunalbestyrelsi suliaqartillugu, suliap suliarinerani peqataasinnaallunilu taaseqataasinnaatitaavoq.

**Imm. 2.** Ilaasortap pissutsinik suliassanilu aalajangersimasuni inuttut soqtigisaqarnini pissutigalugu ataatsimiissutiginninnermi taasinernilu peqataasinnaanerminut nalornisoornartoqartillugu Kommunalbestyrelsi ilisimatissavaa.

**§ 9.** Kommunalbestyrelsip taasinerini ilaasortat ataatsimiinermi peqataagunik aatsaat taaseqataasinnaapput.

### **Taasinerit, allannguutissanut aamma ilaannakortumik allannguutissanut siunnersuutit**

**§ 10.** Taasinerit ingerlanneqassapput ilaasortat iniminnit nikuinnerisigut imaluunniit nappaanerisigut imaluunniit paatsuugassaanngitsumik isumaqataanerlutik isumaqataannginnerlutilluunniit oqaatiguniku.

**Imm. 2.** Inatsisitigut allanik maleruagassaqanngikkaangat aalajangiinerit tamarmik amerlanerussuteqarnikkut aalajangiivigineqartassapput.

**Imm. 3.** Borgmesteri isumaqaruni suliassap qanoq inaerneqarnissaa ima nalorninaatsigisoq taasissutigineqarnissaa pisariaqarani tamanna oqaatigissavaa suliassap qanoq inaerneqarneratut isummani oqaatigiitigalugu. Taassuma kingorna ilaasortat arlaannaalluunniit taasinissamik piu-masaqaateqanngippat borgmesterip oqaatigisinnaavaa suliassaq naammassineqartoq inaerneqarneratut isummani naapertorlugu.

**Imm. 4.** Qinersinerit ingerlanneqassapput allaganngorlugit pappiaqqatigut taasivissatigut borgmesterimit agguanneqarlillu tigooqqarneqartussatigut. Borgmesterip qularutisaqarsorinngikkuniuk qinigassaq aalajangersimasoq Kommunalbestyrelsip qinerneqarniartoq imaluunniit qinigaaqqinniartoq siunnersuutigisinnavaa pineqartoq allaganngorlugu taasinerta-qanngitsumik qinigaassasoq. Taassuma kingorna ilaasortaq arlaannaalluunniit taasisoqarnisanik piumasaqaateqanngippat qinigassatut siunnersuutigineqartoq qinigaassaaq.

**§ 11.** Allannguutissatut aamma ilaannakortumik allannguutissatut siunnersuutit saqqummiuneqarsinnaapput taasinissaq pitinnagu, siunnersuutillu taamaattut suliassat marloriarlugit oqaluuserineqartussat siullermeerlugit oqaluuserineqarneranni saqqummiunneqartariaqaratilluunniit ilimasaarutigisariaqanngillat, taamaattoq tak. imm. 2.

**Imm. 2.** Suliassat marloriarlutik oqaluuserineqartussat eqqarsaatigalugit Kommunalbestyrelsi aalajangersinnavoq allannguutissatut aamma pissutsit tunngavigalugit ilaannakortumik allannguutissatut siunnersuutinik saqqummiussimissamut piffissaliisoqassasoq, taamatut isoqartillugu piffissarititaasup qaangiutereerneratigut saqqummiussisoqarsinnaanngilaq.

**Imm. 3.** Allannguutissatut aamma ilaannakortumik allannguutissatut siunnersuutit aappasaaneerlugu oqaluuserinniinissaq sioqqullugu ilaasortanut ilisimatitsissutigineqarsimanngippata oqaluuserinninnerit aallartinneranni borgmesteri siunnersuutit pillugit nalunaaruteqassaaq, taakku saqqummiunneqarsimappata. Borgmesterip aalajangissavaa allannguutissatut siunnersuutit qanoq tulleriinneqarlutik taassisutigineqassanersut, taakku taassisutigineqartassapput siunnersuutigineqaqqaartoq taassisutigineqartinnagu.

**Imm. 4.** Suliassap suliareqqinneaqqaarnissaa pillugu ataatsimiititaliamik pilersitsinissamik, ataatsimiititaliamut pilersinnejareersimasumut innersunneqarnissaanik imaluunniit ataatsimiititaliam i nangillugu suliarineqarnissaanik siunnersuutit suliassap taassisutigineqarnissaa pitinnagu saqqummiunneqassapput. Suliassap oqaluuserineqarnera aallartinneqareersoq siunnersuutit taamaattut sammineqarpata suliassap oqaluuserineqarnera unitsinnejeqassaaq,

Kommunalbestyrelsillu aalajangiiffigissavaa suliassaq ataatsimiititaliami oqaluuserineqassanersoq.

### Amerlanerussuteqarnikkut qinersinerit

**§ 12.** Borgmesterimik, siulittaasullu tullia siulleq tullianillu, inunnillu ataasiakkaanik qinersinerit allat, taakkununnga ilanngullugit kommunemi sulisussanik atorfinititsinerit, amerlanerussuteqarnikkut qinersinerit naapertorlugit ingerlanneqassapput, tak. aqtsinermi inatsisip § 6, imm. 2.

**Imm. 2.** Amerlanerussuteqartitsilluni qinersinermi qinigassanngortittoq ilaasortanit najuuttunit amerlanerpaanit taaneqartoq qinigaassaaq. Taamatut amerlanerussuteqanngitsoorpat amerlanerpaanik taaneqarsimasut aalajangersimasut marluk akornanni qinersisoqassaaq. Taasinerit amerlaqatigiippata makitsinikkut aalajangiineqassaaq.

### Qanoq amerlassuseqarneq tunngavigalugu qinersinerit

**§ 13.** Ilaasortanik marlunnik amerlanerusunilluunniit Kommunalbestyrelsip atorfinnut makkununnga Borgmesterip tullianik siullermik aappaanillu, ataatsimiititalianut, kommissioninut, siulersuisunut assigisaanullu ilaasortanik qinersineri, qanoq amerlassuseqarneq tunngavigalugu pissapput.

**Imm. 2.** Qanoq amerlassuseqarneq tunngavigalugu qinersinerit aqtsinermi inatsisip § 35, imm. 4 malillugu ingerlanneqassapput imatut: Kommunalbestyrelsimi ilaasortat immikkoortunut agguatissapput qinersinissami pineqartumi qanoq taasiumanerlutik borgmesterimut nalunaaruteqarsimanertik malillugu. Immikkoortut ataasiakkaat ilaasortaat agguarneqassapput 1-imik, 2-mik 3-mik il.il. Taakku malillugit amerlassuseq malillugu tulleriinnilerlutik immikkoortut sinniisuutitassatik qinertassavaat. Amerlassutsit marluk amerlanerilluunniit amerlaqatigiippata qanoq tulleriinneqarnissaq makitsinikkut aalajangerneqassaaq. Immikkoortut ataasiakkaat sinniisuutitassatik naammatsillugit aalajangiiffigereerunikit piaartumik borgmesterimut nalunaarutigissavaat kikkut toqqarneqarsimanersut. Immikkoortup sinniisuutitassani ataaseq arlallilluunniit toqqanngitsoorsinnaavai. Taamatut pisoqartillugu inissat inuttalerneqanngitsut immikkoortut allat akornanni siuliani taaneqartutut inuttalerneqassapput.

**§ 14.** Kommunalbestyrelsip ataatsimiinnerini aalajangiinerit allanneqassapput borgmesterip allattaanit aalajangiinernut imaqarniliami. Borgmesterip oqaatigissavai suut allanneqassanersut.

**Imm. 2.** Ilaasortaq kinaluunniit piumasaqarsinnaavoq isummani allaasoq naatsumik imaqarniliami allanneqaqqullugu.

**Imm. 3.** Aalajangiinernut imaqarniliaq ataatsimiinnerit naammassinernerini, allanneqarsimasut atuarneqareeraangata, ilaasortanit ataatsimeeqataasimasunit tamanit atsiorneqassaaq. Ilaasortat taasisimanertik imaluunniit pissutsit allat innersuutigalugit aalajangiinernut imaqarniliaq atsiorumanngissinnaanngilaat. Borgmesterip qulakkiissavaa, aalajangiinernut imaqarniliaq ataatsimiinnermi peqataasunit atsiorneqarnissaa.

**Imm.4.** Imaqarniliap atsiorneqarneraniit kingusinnerpaamik qaammat ataaseq qaangiuppat ammasumik matoqqasumillu ataatsimiinnermi imaqarniliap nuutinnera Nakkutilliisoqarfimmum

borgmesterimit nassiunneqassaaq.

**§ 15.** Ilaasortaq kinaluunniit suleriaasissami aalajangersakkat qanoq paasineqarnissaannik borgmesterip aalajangiinera malissallugu pisussaatitaavoq, apeqqutilli Kommunalbestyrelsip tullianik ataatsimiinnissaani saqqummiunneqarsinnaatitaapput.

### Suleriaasissami allannguutit

**§ 16.** Suleriaasissaq una atuutilissaaq 15. juni 2017-imi.

Taamaalilluni kommunalbestyrelsimit akuersissutigineqarpoq ulloq 15. juni 2017-imi.



Malik Berthelsen  
Borgmester



Paneeraq Olsen  
Kommunaldirektør